

Headlines

- जम्मू-कश्मीर विधानसभा नै केंद्र शासित प्रदेश लेई विशेष दर्जे दी मंग आह्ला प्रस्ताऽ पास कीता ऐ। मुखमंत्री उमर अब्दुल्ला होरें आखेआ जे एहू प्रस्ताऽ पास करियै विधानसभा नै अपना कम्म करी दित्ता ऐ। बीजेपी नै इस प्रस्ताऽ दे बरोध च धरना-प्रदर्शन कीता।
- भारतीय फौजै 550 अस्मी मशीन पस्तौलें गी अपनी उत्तरी कमान च शामिल कीता।
- डोनाल्ड ट्रम्प होरें अमरीका दे राष्ट्रपति चुनाएं च जित्त हासल कीती ऐ। प्रधानमंत्री नरेंद्र मोदी होरें डोनाल्ड ट्रम्प होरें गी उंदी ऐतिहासिक जित्त पर मुबारकबाद दित्ती ऐ।
- जम्मू-कश्मीर सरकारै मलाजमें आसेआ अपनी कारकरदगी दे आंकलन आहली रिपोर्ट जमा कराने दी खीरी तरीक 15 नवंबर तगर बधाई दित्ती ऐ।

<><><><><><>

J&K Assembly

जम्मू-कश्मीर विधानसभा नै केंद्र शासित प्रदेश लेई विशेष दर्जे ते संवैधानिक गरंटिएं दी मंग आह्ला इक प्रस्ताऽ पास कीता। अज्ज बडुलै जि'आं गै सदन दी बैठक लग्गी तां उप-मुखमंत्री सुरिंद्र चौधरी होरें एहू प्रस्ताऽ सदन च रक्खेआ। इस प्रस्ताऽ च सदन अगो एहू मंग बी कीती गेई ऐ जे ओहू केंद्र सरकार गी गुजारश करै जे ओहू विशेष दर्जा ते संविधानिक गरंटिएं गी ब्हाल करने लेई जम्मू-कश्मीर च लोके आसेआ चुने गेदे नुमाइंदें कन्नै गल्लबात शुरू करै ते इनें प्रावधानें गी ब्हाल करने ताई संवैधानिक बवस्थाएं पर कम्म करै। जि'आं गै एहू प्रस्ताऽ सदन च रक्खेआ गेआ। बीजेपी दे सुनील शर्मा हुंदी अगुवाई च विपक्ष नै एहदा बरोध शुरू करी दित्ता ते आखेआ जे एहू प्रस्ताऽ सदन दे कम्मकाज दा हिस्सा नेई ऐ हा। बरोध दे चलदे गै स्पीकर होरें इस प्रस्ताऽ लेई ध्वनिमत कन्नै वोटिंग कराई ते सदन नै इसगी पास करी दित्ता। जारी हंगामें गी दिखदे होई स्पीकर होरें सदन दी कार्रवाई गी दिन भरै लेई स्थगित करी दित्ता। ध्यानजोग ऐ जे संसद नै 5

अगस्त 2019 गी दफा-370 गी खत्म करी दित्ता हा जेह्दे तैह्त्त जम्मू-कश्मीर गी विशेष दर्जा ते अख्तियार थ्होए दे हे।

<><><><><><>

Omar-Resolution

मुख्यमंत्री उमर अब्दुल्ला होरें आखेआ ऐ जे जम्मू-कश्मीर दे विशेष दर्जे दी बहाली लेई केंद्र सरकार ते जम्मू-कश्मीर च लोकें आसेआ चुने गेदे नुमाइंदें बश्कार गल्लबात दी मंग आह्ला प्रस्ताव पास करियै विधानसभा नै अपना कम्म करी दित्ता ऐ। इस प्रस्ताव च जम्मू-कश्मीर दा विशेष दर्जा इक्तरफा हटाए जाने पर चैंता बुज्जी गेददी ऐ। इस प्रस्ताव गी बिजन कुसै चर्चा दे ध्वनि मत कन्नै गै पास करी दित्ता गेआ।

<><><><><><>

BJP

भारती जनता पार्टी दी जम्मू-कश्मीर इकाई नै जम्मू-कश्मीर दे विशेष दर्जे दी बहाली बारै अज्ज संसद आसेआ पास कीते गेदे प्रस्ताव दी निंदआ लेई बरोध प्रदर्शन कीता। इस प्रस्ताव च जम्मू-कश्मीर दे विशेष दर्जे दी बहाली लेई केंद्र सरकार ते प्रदेश दे चुने गेदे नुमाइंदें बश्कार गल्लबात दी मंग कीती गेदी ऐ। पार्टी दे प्रदेश प्रधान सत शर्मा हुंदी अगुवाई च बीजेपी कार्यकर्ताएं दे इक समूह नै त्रिकुटा नगर च पार्टी हैडक्वार्टर दे बाहर धरना-प्रदर्शन कीता। इस मौके पर उनें मुख्यमंत्री उमर अब्दुल्ला ते उपमुख्यमंत्री सुरिंद्र चौधरी हुंदे पुतले फूके ते नेशनल कांफ्रेंस दी अगुवाई आहली जम्मू-कश्मीर सरकार दे खलाफ नारेबाजी बी कीती।

<><><><><><>

Army

देश गी आत्मनिर्भर बनाने दे हीलें गी अगगे बधां दे होई भारतीय सेना नै अपने उत्तरी कमान च 550 अस्मी मशीन पस्तोलें गी शामिल कीता ऐ। इनें पस्तौलें गी भारतीय सेना दे कर्नल प्रसाद बनसोद होरें रक्षा अनुसंधान ते विकास संगठन-डी.आर.डी.ओ दी सांझ-भ्याली कन्नै तैयार कीते दा ऐ। भारत च तैयार होए दे एहू हथियार सेना दी आत्मनिर्भर भारत अभियान दी बत्ता च महत्वपूर्ण गैहू ऐ। एहूदे राएं भारत गी रक्षा निर्माण दे क्षेत्र च होर अगगे बधने दा इक्क मौका थोआ ऐ।

<><><><><><>

Army-Recruitment

भारतीय सेना औंदी 8 नवंबर शा 20 नवंबर 2024 गी पुंछ जिले दे सुरनकोट दी एडवांस लैंडिंग ग्राउंड च इक्क भर्ती रैली दा आयोजन करा'रदी ऐ। आकाशवाणी जम्मू दे संवाददाता नै जानकारी दित्ती ऐ जे एहू रैली जम्मू-कश्मीर दे नौजोआनें गी भारतीय सेना च शामिल होने ते देश दी सेवा करने दा मंच प्रदान करा'रदी ऐ। भर्ती रैली जम्मू डिविजन दी 31 तहसीलें जिंदे च पुंछ, राजौरी, रियासी दे नौजोआनें लेई सेना दी जनरल डिप्टी लेई खोली दित्ती जाग। उआं समूलचे केंद्र शासित प्रदेश जम्मू-कश्मीर दे नौजोआन क्लर्क ते ट्रेड्समैन पोजीशन लेई एप्लाई करी सकदे न। सेना ते सिविल प्रशासन आपसी सांझ भ्याली कन्नै इस रैली गी कामयाब बनाने दा हर संभव यत्न करडन। सेना नै इस भर्ती रैली गी कामयाब बनाने ते खित्ते दे नौजोआनें गी भारतीय सेना च शामिल करने दा पूरी कोशश करोग।

<><><><><><>

LG-Rana

जम्मू-कश्मीर दे उप-राज्यपाल मनोज सिन्हा होरें अज्ज बीजेपी दे सुर्गवासी नेता देवेन्द्र सिंह राणा हुंदे घर जाइये सौहार्द परोआर कन्नै बसोस प्रगट कीता। एहूदे बारै जानकारी जम्मू-कश्मीर दे सूचना ते जन संपर्क विभाग नै सोशल मीडिया मंच एक्स पर सांझी कीती।

Trump

अमरीका दे साबका राष्ट्रपति डोनाल्ड ट्रम्प होरें अपनी डेमोक्रेटिक प्रतिद्वंदी कमला हैरिस गी राष्ट्रपति चुनांऽ च हराइयै ऐतिहासिक जित्त दर्ज कीती ऐ। जित्तने पर अपने भाशण च ट्रम्प होरें आखेआ जे अमरीका नै उनेंगी बेमिसल जनादेश दित्ता ऐ ते एहू अमरीका दा सनैही दौर होग। फ्लोरिडा दे वेस्ट पाम बीच थाहू अपने जेत्तू भाशण च ट्रम्प होरें आखेआ जे उंदी एहू जित्त अमरीका गी परतियै ठीक करने च मदद करोग। दुनिया भरै दे केई सारे नेताएं ट्रम्प होरें गी उंदी ऐतिहासिक जित्त पर मुबारकबाद दित्ती ऐ। अमरीका च कुल 50 राज्य न जिंदे चा किश गी छोड़ियै बाकी दे राज्य हर बारी इक्के पार्टी दे हक्के च मतदान करदे ना।

<><><><><><>

PM-Trump

प्रधानमंत्री नरेंद्र मोदी होरें अमरीका दे राष्ट्रपति चुनाएं च जित्त पर डोनाल्ड ट्रम्प होरें गी बधाई दित्ती ऐ। सोशल मीडिया दी इक पोस्ट च प्रधानमंत्री होरें आखेआ जे ट्रम्प हुंदी ऐतिहासिक जित्त दे कन्नै उनें भारत ते अमरीका दी रणनीतिक सांझ-भ्याली तगड़ी करने च सैह्योग दी हीखी लाई दी ऐ। श्री मोदी होरें वैश्विक शांति, स्थिरता ते समृद्धि गी बढ़ावा देने ते दौनें देसें दे लोकें दे हितै च किट्टे रलियै कम्म करने दी बचनबद्धता जाहर कीती।

<><><><><><>

SAR

जम्मू-कश्मीर सरकारै मलाजमें दी कारकरदगी दी निगरानी आहली प्रणाली-ई.पी.एम दे तैहत जुलाई शा सितंबर तगर दी त्रीऽ तिमाही लेई सेल्फ असिस्टेंट रिपोर्ट यानि आपूं अपनी कारकरदगी दे आंकलन आहली रिपोर्ट जमा कराने दी खीरी तरीक बधाइयै 15 नवंबर करी दित्ती ऐ। मलाजमें आसेआ इत्त सरबंध्यै च कीती गेदी गुजारशें दे मद्देनजर एहू फैसला लैता गेआ ऐ। सरबंध्यत रिपोर्टिंग अफसरें पासेआ इनें रिपोर्टें दे जायजें दी खीरी तरीक हून 25 नवंबर मुकर्रर कीती गेई ऐ। इस बारै जारी हुकमै च कमिशनर सैक्रेटरी संजीव वर्मा होरें आखेआ ऐ जे बक्ख-बक्ख वजहें करी केई सारे मलाजम अक्तूबर दे अखीरै तोड़ी अपनी जायजा रिपोर्ट दाखल

नेई करी सके न जिस करी हून एहदी खीरी तरीक गी बधाइयै 15 नवंबर करी दित्ता गेआ ऐ। हुक्मै च इब्बी आखेआ गेआ ऐ जे सब्बै प्रशासनिक विभाग ई.पी.एम सरिस्ते पर मलाजमें आसेआ तिमाही रिपोर्टां दर्ज करने दे कम्मै दी नियमित निगरानी करडन।

<><><><><><>

JKPDL

उधमपुर च जम्मू पावर डिस्ट्रीब्यूशन कार्पोरेशन लिमिटेड JPDCL ने बिजली सुरक्षा सरबंधी इक्क रोजा सिखलाई प्रोग्राम दा आयोजन कीता। JPDCL दे प्रबंध निदेशक चौधरी मोहम्मद यासिन होर इस मौके मुख परौहने हे जिले दे तकरीबन 150 अधिकारियें ते फील्ड स्टाफ नै इस सिखलाई प्रोग्राम च हिस्सा लैता।

<><><><><><>

Farmer

डोडा दे डिप्टी कमिशनर हरविंद्र सिंह होरें 28 मकामी करसानें दे इक्क समूह गी श्रीनगर सिखलाई ते तजुर्बा हासल करने लेई झंडी दस्सियै रवाना कीता। एहदा मकसद करसानें दा सशक्तिकरण करना ऐ तो जे करसान राई-बाई दी आधुनिक तकनीकें ते कौशल दे विकास बारै जानकारी होई सकन। डी.सी डोडा होरें करसानें गी नमीं तकनीकां अपनाने लेई गलाया तां जे राई-बाई दे क्षेत्र च पैदावार बधाई जाई सकै।

<><><><><><>

Reasi

रियासी च स्टेट बैंक ऑफ इंडिया ग्रामीण स्वयं रोजगार प्रशिक्षण संस्थान आसेआ दित्ता जा'रदा Computerized Accounting दा सिखलाई प्रोग्राम अज्ज सम्पन्न होई गेआ। 30 दिन चलने आहले इस प्रोग्राम च 30 नौजोआनें सिखलाई लैती।

<><><><><><>

Street-Play

उधमपुर दे गौरमेंट कॉलेज दे विद्यार्थियों गोल मार्केट च नौजोआनें गी तम्बाकू दा इस्तेमाल नेई करने सरबंधी इक्क नुक्कड़ नाटक दा प्रदर्शन कीता। सीएमओ उधमपुर डॉ. अनिल मन्हास हुंदी निगरानी च पूरे समारोह दा आयोजन होआ। बड़ी मती गिनतरी च लोकें इस नुक्कड़ नाटक गी दिक्खेआ ते मेडिकल छात्रें दी सराहना कीती।

<><><><><><>

Poonch-LinkUp

पुंछ लिंक अप डे दे जश्र दे इक्क हिस्से दे तौरा पर भारतीय सेना नै अज्ज टैलेंट हंट दा आयोजन कीता जेह्दे च पुंछ दे बक्ख-बक्ख शिक्षा संस्थानें दे विद्यार्थिएं संगीत, स्किट, नृत्य ते डिबेट प्रतियोगिता च हिस्सा लैता। इस प्रतियोगिता च हिस्सा लैने आहली इक प्रतियोगी संगीता शर्मा नै आकाशवाणी कन्नै गल्ल करदे होई आखेआ जे भारतीय सेना नै असेंगी अपनी प्रतिभा दा प्रदर्शन करने दा मौका दित्ता ऐ।

<><><><><><>